

COMUNICATO n. 511 del 06/03/2025

S hòt zait finz as de secksaontzboa'sk van moi za stelln vour de projektn

“Junga as de pèrng: projektn va lem, va òrbet, va bèrk”, s vonk u' der Argealpprais 2025

[Mòcheno] Pet en titl “Junga as de pèrng: projektn va lem, va òrbet, va bèrk” de autonome Provinz va Trea't, as haier president ist va de Òrbetgamoas'schòft, hòt tschèrlt abia trogtema der Argealpprais 2025, asou za gem stimm en de pèrngplatz tschèrlt ver za lem òll to, iberhaup abia as de iberlems de jungen as lem ont òrbetn as de pèrngplatz, gem bèrt en de projektn as leing en earste plòtz ont en an ausòndern, original ont bidernomòchen vurm de òrbetaussicht en de jungen as lem en de alpinelander. Der zil van Prais 2025, pet an prais va zeichen tausnt euro, ist der sèll za gem bèrt en de naiòrbetn as unterstitzn de zòmmpintn van jungen van regionen Arge Alp pet en aigene lònt. S hòt zait finz as de secksaontzboa'sk van moi ver za stelln vour de projektn.

En Argealpprais 2025 meing toalnemmen innrichtn as sai' en paudorver, as unterstitzn de jungen unternemer en de platz as stea' aus van stòtn: bèrkn ont start-up as trong vour bèrkprojektn en an ausònder ont original vurm, iberhaup as kearn de jungen, pet en prauch van earstn natural materialn van plòtz; schualn, bou as inntschrim sai' studentn van viarzen jor envire, as tschbinnen projektn va recycling ont upcycling ver za gem bèrt en de ringbirtschòft ont en biderprauch van earstn natural materialn van plòtz. Der projekt miast sai' schoa' u'pfònk, ober nou nèt garift. S meing nèt kemmen vourstellt projektn zuazolt pet europeische programm va dirèkta regiar.

Zbischn de projektn vourstellt barn earst kemmen tschèrlt de pestn van an earste lokalschèrl, as derno an iatz dorf bart vourstelln en an international praisgericht. De doi bart tschernen de pestn secks projektn (drai ver òll kategori), ont de bart gem der prais garift der Zòmmtreff van Arge Alp Stòtt Viarer as bart se hòltn ka Trea't as de draiaontzboa'sk ont as de viaraontzboa'sk van schanmikeal 2025. Der international derkenn, ver òll kategori, gip zboatausnt euro ver en earste prais, tausntvinfhundert euro ver en zboate ont tausnt euro ver en dritte prais.

Der bando ont de vrogtoalnemm kònt men vinnen as de sait: <https://www.argealp.org/it>

Arge Alp ist an òrbetgamoas'schòft gagrunt as de zbelva van schanmikeal 1972 ka Mösern en Tirol, pet en zil za stitzn de neat van alpineplatz as enteressiarn ungefèr secksaontzboa'sk milionen va lait. S sai' toalnemmer va Arge Alp s Taitschlònt pet en Vraistòtt va Baiern, s Osterreich pet de Länder van Vorarlberg, van Tirol ont va Sölzburg, s Baltschlònt pet de autonome Provinzn va Poazn ont va Trea't ont de Region Lombardia, de Schbaiz pet de Kantonen van Grigioni, van San Gallen ont van Ticino.

Ibersetz gamòcht van Sprochtirl va de Tolgamoas'schòft Hoa Valzegu' ont Bersntol

(cdt)